

Bondia!

Ha'u-nia respeitus ba:

- Diretora UNICEF iha Timor-Leste, Valerie Taton
- Diretór Sentru Saúde Comoro,
- Diretór Misaun USAID, Jim Wright

Ha'u kontente tebes mai hamutuk ho Diretora UNICEF Valérie Taton no ita-boot sira hotu iha dadeer ne'e iha Sentru Saúde Comoro. Ohin ita selebra kooperasaun entre UNICEF, Estadus Unidus, no Ministériu Saúde hodi ajuda Timor-Leste luta-hasoru pandemia COVID-19.

Ha'u hakarak kongratula Ministériu Saúde, governu no povu Timor-Leste ba sira-nia esforsu tomak too agora hodi prevene transmisaun COVID-19 iha Timor-Leste.

Timor-Leste nia profisionál saúde no primeiru sokoru barak ne'ebé serbi ho laran tomak, merese atu hetan ita hotu nia agradesimentu espesiál. Hanesan ita-hotu hatene, total kazu menus no laiha ona kazu foun dezde fulan abril.

Maibé, hanesan Timor-Leste ninia lideransa sira hatete, ne'e lá'os tempu atu husik livre ita ninia guarda. Vírus ne'e sei eziste iha mundu no COVID-19 sei sai hanesan ameasa iha nasaun barak, inklui nasaun viziňu Indonézia. Ema hotu presiza kontinua pratika ijiene fase liman ne'ebé di'ak, distansiamentu fíziku no presiza uza máskara bainhira besik ho ema ruma.

Vírus COVID-19 ne'e forte, maibé ita tenke forte liu tan. Tanba ne'e mak, servisu ne'ebé UNICEF halo ho apoiu husi Estadus Unidus ne'e importante tebes. USAID anunsia ona apoiu-orsamentu dólar rihun atus lima (\$500,000) ba UNICEF iha fulan kotuk. Prémiu ne'e hodi apoia komunikasaun risku, divulgasau komunidade, no kontrolu infesaun no bee no saneamentu iha munisípiu sira balu – no iha mós Sentru Saúde Comoro.

Projetu ida-ne'e parte ida husi dólar millaun ida pontu hitu (\$1.7 million) ne'ebé mak Estadus Unidus fornese hodi ajuda apoia Timor-Leste luta-hasoru COVID-19.

Montante ne'e aumenta tanba ami mós ajuda projetu sira seluk agora no iha futuru mak hanesan estasaun ba fase liman, máskara ba estudante sira iha eskola no fornese jeradór ida iha Sentru Saúde Vera Cruz.

Estadus Unidus mós nu'udar kontribuinte bo'ot ba organizasaun multilaterál sira hodi luta-hasoru COVID-19, no organizasaun sira ne'e hotu ativa hela iha Timor-Leste. Ezemplu, USAID iha Washington fornese dólar millaun tolu nulu (\$30 million) hodi possilita Programa Aihan Mundiál nia voo-umanitáriu ne'ebé mak benefisia ona Timor-Leste no NASAUN sira seluk.

Em jerál, Estadus Unidus Amérika ajuda ona Timor-Leste nia setór saúde dezde independénsia, fornese ona dólar millaun hitu nulu (\$70 million) hodi haforsa sistema saúde no asesu servisu saúde ba Timoroan tomak.

Ohin, ami nia parseria ho UNICEF ajuda haforsa prevensaun infesaun no kontrolu iha facilidade saúde sira . Projeto ne'e sei asegura katak pesoál, pasientes, no vizitante sira bele atu maneja vírus ne'e no mikróbiu sira seluk liuhusi fase sira nia liman beibeik ho sabau no bee nomós dezinfeta superfísie sira . Asaun simples hirak ne'e nu'udar kilat efetivu sira iha funu hasoru COVID-19.

Ita mós presiza lembra katak bainhira ita luta-hasoru COVID-19, ita tenke kontinua esforsu sira hodi responde ba problema sáude sira seluk. Partikularmente, feto isin rua tenke kontinua hetan check-up regulár no inanaman sira tenke kontinua lori sira-nia oan sira ba simu imunizasaun hirak ne'ebé sira presiza.

Ohin loron hodi ita selebra. Obrigada ba Diretora UNICEF Valérie Taton no ninia ekipa husi UNICEF ba sira-nia dedikasaun servisu. Ha'u fó obrigadu no basa liman nafatin ba governu nia servisu no povu Timor-Leste iha luta-hasoru emergénsia saúde pública ida-ne'e. Estadus Unidus Amerika kontinua sai hanesan parseiru importante ho Timor-Leste iha ninia esforsu luta-hasoru COVID-19. Ami kompartilla Timor-Leste nia objetivu sira iha ninia jornada ba auto-reziliénsia.